

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 09.01.2025

प्रमुख समाचार –

- मुंगेली जिला के सरगांव स्थित एक ठिन फैक्ट्री के चिमनी ह आज मंझनिया अचानक गिर गे— मलबा के नीचे दबे मजदूर मन ल निकाले बर रेस्क्यू अभियान चलाय जात हे।
- सुकमा जिला म आज सुरक्षा बल मनके संग होय मुठभेड़ म तीन झिन माओवादी मनके मारे जाय के खबर हे
- फेर माओवादी मनके मारे जाय के अधिकारिक पुष्टि अभी तक नइ होय हे।
- केंद्रीय कृषि मंत्री शिवराज सिंह चौहान ह काली दस जनवरी के दुरुग जिला म एक दिवसीय दउरा म आवत हे— ए बेरा म श्री चौहान ह प्रधानमंत्री आवास योजना के सौगात दिही।

मुंगेली-फैक्ट्री हादसा

मुंगेली जिला के सरगांव स्थित एक ठिन फैक्ट्री के चिमनी ह आज मंझनिया अचानक गिर गे, जेखर नीचे कतकोन मजूर मनके मलबा म दबे के आसंका हे। ए घटना के तुरते बाद पुलिस अउ प्रशासन के टीम ह पहुंचिस अउ रेस्क्यू ऑपरेशन ल सुरू करीस। अभी तक दू मजदूर ल गंभीर हालत म बाहिर निकाले जा चुके हे, जेला बिलासपुर के अस्पताल म भर्ती कराय गेहे। उहें, बांकी मजदूर मन ल निकाले बर रेस्क्यू अभियान चलाय जात हे।

पुलिस ह बतइन कि फैक्ट्री के चिमनी ह अतेक भारी हे कि ओला हटाय म बहुत मुश्किल होवत हे। संगेसंग चिमनी म भारी मात्रा म राख होय ले घलो रेस्क्यू करे म परेसानी आत हे।

माओवादी-मुठभेड़

सुकमा जिला म आज सुरक्षा बल मनके संग होय मुठभेड़ म तीन झिन माओवादी मनके मारे जाय के खबर हे। फेर माओवादी मनके मारे जाय के अधिकारिक पुष्टि अभी तक नइ होय हे। जानबा के अनुसार—डीआरजी, एसटीएफ अउ सीआरपीएफ के कोबरा बटालियन के संयुक्त टीम ह बीजापुर जिला के सीमा म माओवादी मनके मौजूदगी के सूचना म निकले रिहीस। फेर इही बेरा म सुरक्षा बल अउ माओवादी मनके बीच मुठभेड़ होगे।

विजय शर्मा-बैठक

उपमुख्यमंत्री विजय शर्मा के अध्यक्षता म काली मंत्रालय म गृह विभाग के एक ठिन समीक्षा बइठका होइस। बइठक म उपमुख्यमंत्री ह एनडीपीएस एक्ट के चलत जारी एसओपी के पालन ल लेके अधिकारी मन ल सख्त निरदेस देहे। ओमन ह किहीन हे कि नसा के अवैध कारोबार म सामिल लोगन मनके खिलाफ कड़ा कार्रवाई करे जाय। ओमन ह स्पष्ट करे हे कि अगर कोनो पुलिस अधिकारी या फेर कोनो करमचारी ए अवैध कारोबार म सामिल होही, त उंखर खिलाफ तुरते बर्खास्त करे के कार्रवाई करे जाही।

बइठका म उपमुख्यमंत्री ह पुलिस विभाग के करमचारी अउ अधिकारी मन बर नवा स्थानांतरण नीति ल लागू करे के घलो निरदेस दीन हे। संगेसंग सहीद जवान मनके परिवार ल प्राथमिकता देत हुए अनुकम्पा नियुक्ति के लंबित प्रकरण के निराकरण ल जल्दी करे बर केहे हे। ओमन किहीन कि सहीद होय जवान मनके “अमर बलिदानी स्मारक” के निर्माण उंखर परिवार के सहमति ले प्राथमिकता के आधार म करे जाय। जेखर ले ओखर सहादत के सम्मान हर स्तर म सुनिश्चित हो सकय।

चिटफंड कंपनी के खिलाफ होवत कार्रवाई के समीक्षा करत हुए उपमुख्यमंत्री ह किहीन हे कि अइसन कंपनी के बांचे संपत्ति के जल्दी निलामी करे जाय अउ ओखर ले मिले पइसा ल प्रभावित निवेशक मन ल लहुटाय जाय। बड़ठका म यातायात प्रबंधन ल प्रभावी बनाय बर ब्लैक स्पॉट्स के चिन्हांकन अउ ओखर समाधान के कार्ययोजना ल लेके घलो चर्चा होइस।

भाजपा संविधान-गौरव यात्रा

भारतीय संविधान के पचहत्तरवां बछर के मउका म भारतीय जनता पार्टी ह प्रदेश म ग्यारा ले पच्चीस जनवरी तक संविधान गौरव यात्रा निकालही। ए अभियान के सफल संचालन बर राज्य स्तरीय समिति के गठन घलो करे गेहे। ए समिति के संयोजक पूर्व नेता प्रतिपक्ष नारायण चंदेल ल बनाय गेहे। उहें, भाजपा विधायक गुरु खुशवंत साहेब ह समिति के सह-संयोजक होही। नीलकंठ टेकाम, अनुसूचित जाति मोर्चा के प्रदेश अध्यक्ष नवीन मारकंडे अउ किरण बघेल ल सदस्य नियुक्त करे गेहे।

संविधान गौरव अभियान समिति के प्रदेश संयोजक नारायण चंदेल ह बतइन कि ए यात्रा के चलत सबो प्रदेश के राजधानी अउ प्रमुख केंद्र म पचास गोष्ठी के आयोजन करे जाही, जेमा केंद्र सरकार के मंत्री अउ भाजपा के वरिष्ठ नेता मन सामिल होही। ओमन ह बतइन कि यात्रा के बेरा सबो जिला केंद्र म अनुसूचित जाति मोर्चा कोति ले “हमारा संविधान-हमारा स्वाभिमान” बिसय उपर गोष्ठी के आयोजन करे जाही। उहें, स्कूल, कॉलेज, विश्वविद्यालय अउ सबो शिक्षण संस्थान म क्वीज निबंध अउ भाषण प्रतियोगिता आयोजित करे जाही।

चौहान-दौरा

केंद्रीय कृषि मंत्री शिवराज सिंह चौहान ह काली दस जनवरी के छत्तीसगढ़ के एक दिवसीय दउरा म आवत हे। ए बेरा म श्री चौहान ह प्रधानमंत्री आवास योजना के सौगात दिही। संगेसंग ओमन ह कुम्हारी के मिनी स्टेडियम म चलत किसान मेला म सामिल होही। एखर बाद केंद्रीय मंत्री ह भोपाल बर रवाना हो जही।

मुख्यमंत्री-धमतरी

मुख्यमंत्री विष्णुदेव साय ह काली धमतरी जिला म दू सौ अड़सठ करोड़ रुपिया के कतकोन विकास कार्य के लोकार्पण अउ भूमिपूजन करीन। ए बेरा म ओमन ह धमतरी म स्वामित्व कार्ड के वितरण के सुभारंभ करीन। कारीकरम ल संबोधित करत हुए मुख्यमंत्री ह किहीन कि स्वामित्व कार्ड के माध्यम ले ग्रामीण क्षेत्र म आबादी भूमि म रहइया लोगन मनके समस्या दूर होवत हे। ए लोगन मन ल आबादी भूमि म स्वामित्व के पक्का दस्तावेज मिलत हे। उहें, प्रदेश ह नागरिक सुविधा ल आसान अउ मजबूत करे खातिर डिजीटल गर्वनेंस के मॉडल ल अपनाय गेहे। ओमन ह किहीन हे कि रजिस्ट्री म लोगन मन ल सुविधा हो एखर बर सरकार ह सुगम ऐप तियार करे हे। कारीकरम म मुख्यमंत्री ह कतकोन योजना के हितग्राही मन ल सामग्री घलो बांटिन।

ए कारीकरम ल उप मुख्यमंत्री अरुण साव, खेलमंत्री टंकराम वर्मा अउ कुरुद विधायक अजय चंद्राकर ह घलो संबोधित करीन।

मलखंभ अकादमी

प्रदेश के खिलाड़ी मन ल अच्छा प्रसिक्षण सुविधा दे खातिर नारायणपुर म मलखंभ अकादमी के सुरुआत करे जाही। ए अकादमी बर राज्य सरकार ह, तेरह ठिन नवा पद ल भरे बर मंजूरी दे देहे। मलखंभ अकादमी म अंतर्राष्ट्रीय स्तर के कतकोन सुविधा अउ प्रसिक्षक मनके बेवस्था करे जाही, जेखर ले खिलाड़ी मन ल उच्च स्तरीय प्रसिक्षण मिल सकही।

पेंगोलिन तस्कर-आरोपी गिरफ्तार

बस्तर वन मंडल, वन उड़नदस्ता रायपुर अउ वाइल्डलाइफ ट्रस्ट ऑफ इंडिया के टीम ह एक संघर मिलके तैंतीस किलो पेंगोलिन के छाल ल जब्त करे हे। सूचना के आधार म वन विभाग के टीम ह तीन झिन आरोपी मन ल आने-आने जघा ले गिरफ्तार करे हे। पाछू सात जनवरी के मारे गे छापा म आरोपी जेम्स मैथ्यू ल

जगदलपुर ले गिरफ्तार करके ओखर करा ले बत्तीस किलो पेंगोलिन के छाल ल जब्त करे गीस। उहे, चित्रकोट ले चुन्नीलाल बघेल अउ राजकुमार कुशवाहा ल ग्यारा किलो पेंगोलिन के छाल के संग पकड़े गेहे। फेर दू झिन आने आरोपी मन ह अभी भी फरार हे। आरोपी मन करा ले तस्करी के बेरा म बउरे एक ठिन मोटर साइकिल ल घलो जब्त करे गेहे।

अंबेडकर अस्पताल—पैथालॉजी लैब

रायपुर के डॉक्टर भीमराव अंबेडकर स्मृति चिकित्सालय के कतकोन वार्ड म भर्ती मरीज मनके घर वाला मन ल अब खून के जांच कराय बर पैथालॉजी लैब जाय बर नइ पड़ही। वार्ड म भर्ती सबो मरीज के पैथालॉजिकल जांच बर ओखर खून के सैंपल ल वार्ड बॉय ह पैथोलैब तक पहुंचाही अउ जांच के बाद ब्लड रिपोर्ट इकट्ठा करके ओखर ले संबंधित वार्ड म ऑन ड्यूटी नर्स ल दे जाही।

रायगढ़—वार्षिक कॉन्फ्रेंस

इंडियन एसोसिएशन ऑफ पैथोलॉजिस्ट के छत्तीसगढ़ चेप्टर के वार्षिक कॉन्फ्रेंस ह काली दस जनवरी ले रायगढ़ के शासकीय मेडिकल कॉलेज म आयोजित करे जाही। बारह जनवरी तक चलइया ए कॉन्फ्रेंस म छत्तीसगढ़ के अलावा देसभर के कतकोन जघा ले बिसेसज्ञ चिकित्सक अउ पीजी पढ़इया लइका मन घलो सामिल होही। ए कॉन्फ्रेंस कि बिसय “पैथालॉजी में रोगो की प्रकृति के रहस्यों को पता लगाना” हे।

मौसम

मौसम विभाग के अनुसार हवा के दिसा ह बदले के सेति प्रदेस के न्यूनतम तापमान ह काली ले कुछ बाढ़ सकत हे। अवइया तीन—चार दिन म न्यूनतम तापमान म करीबन चार डिग्री सेल्सियस के बाढ़े के संभावना जताय गेहे। एखर ले लोगन मन ल ठंडा ले कुछू राहत मिलही। ए बेरा म मौसम ह सुष्क रइही। फेर उहें, ग्यारा अउ बारह जनवरी के कोरिया अउ ओखर ले लगे जिला म आंसिक रूप ले बादर कर सकत हे।